

Խ. ՊԱՊԻԿԵԱՆ՝ ՀԻՄՆԱԴՐԱՄԻ ՄՐՅԱՆԱԿԱԲԱՇԽՈՒԹԵԱՆ ԸՆԹԱՅՔԻՆ՝

**ՄՓԻՒՌԻ ՄԷՋ ՀԱՅԵՐԸՆ ԼԵԶՈՒՆ ՄԵՐ ՄԵԾԱԳՈՅՆ ԶԷՆՔՆ Է՝  
ԸՍԱԻ ԱՐԱՄ Ա. ԿԱԹՈՂԻԿՈՍ**









Read in Arial Armenian font

Հայ լեզուի, գրականության ու Հայոց Պատմության, երգի ու ասմունքի մէջ նոր սերունդի յառաջդիմության նպաստող խթան եղան, յաջորդական երկու տարիներէն ի վեր տեղի ունեցող Խ. Պապիկեան՝ հիմնադրամի անունով կազմակերպուող մրցումները:

Հայ նոր սերունդի, հայկական վարժարաններ յաճախող աշակերտության մէջ հայեցի դաստիարակության զարկ տուող այս ծրագիրը մշակուած է Մեծի Տանն Կիլիկիոյ Կաթողիկոսութեան հովանաւորութեամբ, եւ մեծ խանդավառութեամբ ընկալուած գաղութի նորահաս սերունդին կողմէ:

2 Յունիս 2011-ին, հովանաւորութեամբ ու նախագահութեամբ Ն.Ս.Օ.Տ.Տ. Արամ Ա. Կաթողիկոսի, Կաթողիկոսարանի Կիւլպէնկեան՝ հանդիսասրահին մէջ, երեկոյեան ժամը 7-ին տեղի ունեցաւ սոյն հիմնադրամի այս տարուան մրցումին եզրափակումը՝ մրցանակաբաշխութեան հանդիսութիւնը:

Յանուն Խ. Պապիկեան՝ հիմնադրամի մրցումի կազմակերպիչ յանձնախումբերուն բացման խօսքը կատարեց Սարգիս Կիրակոսեան, որ անդրադարձաւ երկու տարիներու փորձառութեան, արձանագրուած յաջողութիւններուն, եւ նկատելի թերութիւններուն: Ան նշեց, թէ երկրորդ տարին աւելի ինքնավստահութեամբ

յատկանշուեցաւ, աւելի եւս բժախնդրութիւն պահանջելով թէ՛ մասնակցող թեկնածուներէն, եւ թէ հարցարաններու պատրաստութեան մարմիններէն:

Հայ լեզուի ու գրականութեան մրցանքի զեկոյցը ներկայացուց Տոքթ. Արմենակ Եղիայեան, որ շնորհաւորելով ներկաները, մրցանակը բաշխուած տեսաւ ո՛չ միայն զայն շահող աշակերտներուն միջեւ, այլ նաեւ անոնց պատկանած դպրոցներուն ու ծնողներուն: Այս եռեակը մէկ ամբողջութիւն ներկայացուց Տոքթ. Եղիայեան, մաղթելով որ անքակտելի միութիւն ըլլայ անիկա: Մանրամասնօրէն ներկայացնելով ներկայ հայերէնագիտութեան մակարդակը մեր աշակերտութեան մօտ, ան ըսաւ, թէ պէտք չէ զեղչումներու ենթարկել հայերէն դասապահերը, յօգուտ օտար լեզուներու ուսուցման:

Հայոց Պատմութեան յանձնախումբի անդամ Համբիկ Մարտիրոսեան ներկայացուց այդ բաժնին ու նաեւ կրօնքի մրցանքին զեկոյցը: Դարձեալ, մատնանշումներ կատարելով, Մարտիրոսեան անդրադարձաւ մասնակցութեան ոգիին, այն մթնոլորտին որ ստեղծուեցաւ սոյն հիմնադրամի ստեղծած մրցանքներուն ճամբով, ինչպէս նաեւ յառաջիկային ուղղելի կարգ մը թերութեանց:

Ասումնքի մրցանքի յանձնախումբի անդամ՝ բեմադրիչ Ռոպերթ Առաքելեան ներկայացնելով իր բաժնի զեկոյցը, աշակերտութեան արուեստի իմացումին եւ ասումնքի շնորհքներուն անդրադարձաւ: Միշտ աւելիին ու կատարելիին ձգտելու ճիգը գնահատեց ան, երբ սիրողական մակարդակի վրայ են մասնակցողները:

Գեղարուեստական բաժնով, մրցանքին մասնակցած ու բարձրագոյն արդիւնքներ ապահոված աշակերտները հերթաբար ելոյթ ունեցան ասումնքներով, հետեւեալ հերթականութեամբ. Միջնակարգի բաժնէն՝ Սարին Էքմէքճեան՝ Մեսրոպաբոյր, Վարանդ Տումանեան՝ Դերենիկը, Սարօ Եագուպեան՝ Հին օրհնութիւն: Իսկ երկրորդականի բաժնէն՝ Շանթ Պաղտասարեան՝ Լեռն ի վեր, Սերօ Քելուկեան՝ Եկեղեցին Հայկական, Սեբաստիա Կիւ.Սրկ. Ղարախանեան՝ Մարդ էլ կայ, մարդ էլ:

Մրցանակաբաշխութենէն ետք, եզրափակելով հանդիսութիւնը, Վեհափառ Հայրապետը գնահատեց բոլոր մասնակիցները, անոնց ուսուցիչները եւ ծնողները, որոնք մղիչ ոյժը հանդիսացած էին այս արդիւնքին:

Արամ Ա. Կաթողիկոս կարեւորութեամբ ընդգծեց հայերէն լեզուին կարեւորութիւնը եւ սրտցաւօրէն յայտնեց անոր նահանջի ախտանշաններուն երեւիլը մեր կեանքէն ներս: Հայ լեզուն սկսած է աղաւաղուիլ: Անցեալին կը թելադրէին մեր ազգի պատասխանատուները, յատկապէս նոր սերունդին, միայն հայերէն խօսիլ: Կացութիւնը միասնաբար պէտք է դարմանենք: Միայն ողբալ չի՛ բաւեր, միայն քննադատել չի՛ բաւեր, այլ պէտք է միասնաբար միջոցներ որոնենք, մեր Արեւմտահայերէնը անաղարտ պահելու համար: Վեհափառ Հայրապետը անընդունելի գտաւ այն պատճառաբանութիւնները, որոնք կու գան դպրոցներէն ու ծնողներէն, հայագիտական նիւթերը նուազեցումը պահանջելով, որպէսզի աշակերտներ կարենան յաջողիլ պետական քննութիւններուն: Անցեալին,

հայկական վարժարաններու աւելի ծանրաբեռն դասացուցակին օրինակը բերաւ Նորին Սրբութիւնը, որ բնա՛ւ արգելք չէր եղած ձախողութեանց, այլ ընդհակառակը, հայկական վարժարաններու աշակերտներ ամենէն փայլուն արդիւնքները ձեռք կը ձգէին: Վեհափառ Հայրապետը խստօրէն դատապարտեց այն ծնողները որոնք օտար վարժարաններ կը դրկեն իրենց զաւակները զանազան պատճառաբանութիւններով: Սփիւռքի մէջ հայերէն լեզուն մեր մեծագոյն զէնքն է: Պատի՛ւ այն երախտաւորներուն, որոնք Հայ Դպրոցը կը պահեն հայ, իր ոգիով ու մակարդակով եզրակացուց Նորին Սրբութիւնը: